

四庫全書

集部

欽定四庫全書

集部

西溪集卷一至三

詳校官庶吉士臣馬履泰

檢討臣何思鈞覆勘

總校官庶吉士臣何思鈞

校對官中書臣李奎

謄錄監生臣曹希焜

欽定四庫全書

集部三

西溪集

別集類二宋

提要

臣等謹案西溪集十卷宋沈邁撰邁字文通

錢塘人以蔭為郊社齋郎皇祐元年舉進士
第一執政以已官者不應先多士奏改第二
歷知杭州開封府皆有能名終於翰林學士
事蹟具宋史本傳所作西溪集本十卷南宋

初有從事郎處州司理叅軍高布者與邁弟
遼雲巢編邁從叔括長興集合刻於括蒼名
吳興三沈集以是編為首然史稱邁通判江
寧還朝奏本治論十篇為仁宗所嘉賞而集
中竟未之載則亦非全帙矣邁以文學致身
而吏事精敏一時推為軼材其知制誥時所
撰詞命大都莊重溫厚猶有古人典質之風
詩亦清俊流逸不染俗韻第二卷末題楊州

山光寺二詩其一有夾注稱為盧中南和詩
其高臺已傾曲池平一首已見前而重出於
此字句稍不同詩下亦有夾注稱傳自山光
寺壁與集中異云云疑皆高布校刊時所增
入非原集之舊也乾隆四十三年八月恭校

上

總纂官臣紀昀臣陸錫熊臣孫士毅

總校官臣陸費墀

[illegible]

欽定四庫全書

西溪集卷一

宋 沈邁 撰

奉祠西太乙宮賦

躬明詔以攝事兮奉祠乎太乙之靈戒前期之三日兮
祇被而造乎神庭命徒御以夕駕兮候北斗之尚明啓
國門而西出兮顧旭日之既升背城闕之嵯峨兮氣佳
哉其可挹度川原之平遠兮風泠然其可乘方陽春之
發茂兮感萬物之舒榮塘水散兮波已淥野雪消兮草

欲青時嘉魚之浮躍聞好鳥之嚶鳴池籞嚴以望幸兮
於以見承平之多豫耒耜載以就田兮於以見黎民之
樂生予心迫然其有獲尚安知乎一舍之遠而徂征者
乎爾乃逍遙而舒榮高舉而遐矚氤氲兮雲霞之含隱
嶙峋兮臺殿之轟鐘磬之音兮砰焉而震於耳金碧之光兮
煜焉而眩於目曾城縣圃乎閬苑崑崙乎其遠也若不
可到海中之神山其邈也若猶可疑漢家之甘泉巍巍
乎雙觀沈沈乎重關鞠躬而下屏息以前趨就乎下房

之次而齋嚴乎其間於是游心於神明致思於精粹披
柱史之書玩漆園之義考星經之說合道家之記蓋太
乙北辰之主而天之貴神也其尊五福其行九宮上運
乎樞機下監乎吉凶沿漢暨唐是類是宗聖朝因焉定
時西東蓋所以逆三神接萬靈致諸福綏羣氓者焉惟
月孟陬惟日辛卯迎氣於郊實協吉卜侍臣焉承其祀
祝史焉贊其禮牢醴兮芬芬幣玉兮煒煒蓋節兮歲
蕤旛旂兮旖旎三陔之壇兮所以降上神八通之道兮

所以賓衆鬼威靈兮如在肸鬻兮受記時也太陰旣傾
列宿在躔紫宮之右天極粲然帝閭兮若啓氛翳兮若
褰美光之發兮赫奕而照耀休氣之充兮輪囷而蜿蜒
凡厥執事之臣莫不肅然震動俯伏於地既起而贊饗
曰泰一報享臨示厥祥錫衍天子萬壽無疆太宗小宗
繼承不忘於是事旣功休而言歸告僕夫以促轡吾
將奏釐於太微

應制依韻和御製後苑賞花釣魚

春入花房次第開上林先望屬車來時忘萬物均民樂
恩許羣臣奉燕杯鳳下朝陽時鼓舞魚遊太液自徘徊
愚心願獻千年壽豈特歡娛一日陪

杭州燕思閣分題四首

以席間所望見為題得偃松院

古寺半空人跡稀老松自偃何年有濯幹欲聳不及尋
蟠枝却覆遂盈畝羣鳳矚日相娑娑病蛟眠沙獨蚴蟉
五月南風翠幄涼三冬朔雪穹廬厚本知託植須岡陵

豈應詘身此培塿往來不用為歎嗟題詩調笑兒女口

以後圃諸亭觀為題得巽亭

守居鳳凰背茲亭壓其顛蒼崖當前斷崩騰孰將騫洪
濤從天來萬鼓瀉百川高士耳目曠壯夫胸膽褰維昔
孰經始蔣侯世稱賢斯人去已久陳迹亦屢遷我來感
且慕拂拭頗增妍尚存甘棠意善政或有傳

探韻送完夫以送君出門歸為韻得歸字

相識已恨晚相從每嫌稀如何復相失頓與中懷違淮

江風波接來云遠我圻一朝晤語隔詎能忘歎歎置酒
衆賓賦觴筆交橫飛高亭山氣佳落日暑力微金池莫
辭滿後會豈易希病夫意不淺亦且倒載歸

是日觀畫以畫為題得胡瓌馬

古來畫馬為世貴前有韓幹後胡瓌幹之所圖獨御早
鑄金有式易為好瓌閱衆馬兼漢胡遂窮能事絕代無
陰山七騎實瓌造傳之至今為畫寶筆端神妙難盡譽
去聲會見真馬騰在圖真馬今人亦何識但愛幹馬肥且

澤後世復有伯樂生丹青雖渝尚典刑

送劉泌歸建州

東都宦遊客風塵厭已久欣然理扁舟歸雁不回首身
與汴流下心先淮波走何時過江望家山見孤嶺武夷
天下名衆溪環左右幽尋莫辭倦勝事不可負逍遙其
無幾官期諒難後

何公南祕閣公會

公從書閣登詞掖西帥重歸始五年當日諸寮半榮落

後來幾輩雜愚賢齋前花樹多新植架上塵籤亂舊編
嘉遇榮名時所貴從容感詠屬觴篇

送沈景休知常州

疊鼓翻波返流響雙旌照地秋日晴蘭陵使君下齋舸
都門送客冠蓋傾使君去從金馬署顏朱髮漆意氣橫
十年待詔困囊粟千騎乞得專城名城居雖小地迺大
物衆力薄俗喜爭惠窮遷暴各有術從來治者難其平
使君才勇固自許一州詎足煩神明從容談笑期月爾

坐聽道路傳能聲教行民服已無事乘時豫樂與衆并
惠山荆溪兩秀絕丹轂畫隼當春行還有歌詩寫高興
賓客誰許從唱賡

送詩僧思齊歸吳

西風送霜河水落東都歸客不可留囊衣卷詩載輕舸
飄然獨下東南州吳山木落衆峰出越湖潦散孤嶼浮
摘丹萼紫新薦俎若下醪美不計售十年塵埃一日去
猿初脫檻鷹下韝幽潛遠颺肯回首送之却顧令人愁

鱸魚正肥張翰老田園將蕪陶潛憂子歸應有問予者
為解區區茲有由

送何中復赴高陵簿

昔初送君向秦關君時失意多悲歎今來送君復西去
君懷新命多歡語別君重見凡四年顏色如故氣軒軒
文章學問益老富卓然遠致信可賢長安古都今大府
并護關西諸節度邇臣元老來後先賢士大夫還而聚
君持利器往從之當能一發胸中奇莫嗟須臾廷下屈

我有鎡基又乘時君家湘衡萬餘里十年遠遊何所事
高車駟馬終當歸努力無為故人恥

送張吉老兩浙提刑

秋日響船鼓西風轉檣鳥使節東南行光華滿江吳里
門過舊遊弩矢方前驅威嚴勉自厲寧顧舊酒徒

贈梅聖俞柑實

柑實來海濱萬里亦以勤中州富佳果乃無一與倫薦
之君子堂豈以多為珍甘滋露欲晞葉色丹猶新愛之

勿久留有酒應速賓

天台山送僧象微歸山

吾聞天台久嘗讀興公賦茲為東南鎮神靈之所據奇
挺究萬狀嵩岱不足語頗疑說過夸特為辭之嫵象微
迺州民能識山之故從容試為問聊得一二疏赤城建
霞標上與牛斗附萬有八千丈矗若天一柱瀑布發高
源飛流翻四注雪霜浮虛空晦明亂朝莫巖足多丹石
光華燦寶璐猶溪百餘仞欲濟毛骨怖九折凌峻梁五

界窮幽路芝蘭散奇草松桂羅嘉樹祥風吹白雲飄然
若可御幽閼足瓌怪纖悉難畢具凡跡古不到神物陰
自護傳聞昔人說中有洞天處是名不死墟衆真所游
聚玉堂敞金庭碧林列瑤圃有能從而求得之迺僊去
斯言寧可信良非吾所慕吾志本丘壑久已失厭趣誰
言石渠客乃甚轍中鮒秋風日已高歸心浩欲鶩茲山
宿所愛遂爾緬東顧吾廬因爾卜俾來審繪素

滑州新修東園

漢家東郡古延津
詔屬王畿命邇臣
儀物增榮都府舊
恩光流浹吏民新
已明條教康罷俗
更飾林園樂盛辰
蚤賦中和來奏御
知公不久整歸輪

又

北輔為藩自昔優
使君深壯稱公侯
樓臺重拂前人記
園中樓臺多賈魏
公李衛公所折造
池圃更新此日遊
比歲豐和多愷樂

乘春臨賞幾遲留
使君詩藻無窮思
賓席誰堪奉唱酬

贈楊樂道建茶

金匱石經
卷一
建溪石上摘先春萬里封包數數珍羸病從來苦多飲
高情應只屬詩人

和楊樂道省中述懷

少小學書史頗知道所存功名謂陳迹古人不復論既
困乃干澤羽翼何翩翩初登羣玉府猶接文字言晚落
司會廷始從俗吏煩朱墨事勾校答榜窮奸諛終日坐
當案曾不聞休番舊學泯不講舊志茲益昏中悼素尚
違仰愧前修尊去之未云果蕩爾何當反覽君自警作

使我忘羈絆友道久寥濶期君於此敦

王景彝省舍孤竹

濯濯青玉竿矯矯孤雲姿潛根失其託憔悴非故時主
人幸加憐曷不徙所宜歲寒風霜節無愧君子知

和邵興宗還館

三年重到集仙庭却理陳編不自停閣下舊題幾已暗
壁中遺簡尚餘青故人擾擾誰相好世事悠悠我特醒
坐看重雲開白日獨搖修翮入高冥

和陳和叔祕閣會話

羣玉嵯峨壓石渠我初通籍預離書三年未厭承明直
一日更從俗吏居對案不堪文墨弊離羣長恨笑言疎
紫宸蚤退春朝永時得期君過舊廬

送李瑜通判潤州

吳越千里廣故鄣臨上游江山號天險人物自風流在
昔為成國於今亦大州時平除圉守地勝足遨遊青嶂
南朝寺蒼烟北固樓尊鱸秋未老行棹莫遲留

送梅公儀知杭州

禁閣深嚴帝策書侍臣才調蜀相如屢從金馬辭番直

又下承明佩左魚弩矢前驅登北固

京口為錢唐屬郡

壺漿迎

路過姑蘇

姑蘇公舊治

使君詩老江山勝早晚新篇到石渠

送許當通判泉州

我昔溫陵行始初得許侯溫陵故佳勝況從吉士游日

月雖無幾所樂良綢繆歸來十載間再見朝王州故人

重相遇尊酒更勸酬歡意我已衰壯心君益邁君顏反

更少我但未白頭乃知中都勞豈若江湖優嗟哉石渠
客有似魚被鈎何不斷去之未知所從流羨君翩然歸
春風帆畫舟錦衣鄉治中弩矢驅道周舊廬何光輝高
堂薦甘羞仕者固應爾自餘信悠悠送君喜寧已顧我
愧莫收幸君謝朋友我志無所求

送陳聖俞壽州從事

天下賢良選公車凡幾人君侯獨高第聲實兩無倫驚
鷺來丹穴麒麟出九真推先東國士傾動漢廷臣未引

金閨籍聊為幕府賓還家莫留滯行看壽陽春

和吳沖卿省舍觀蘇才翁題壁

空堂老壁隄塵昏蘇子之蹟世所珍
龍虎變化生風雲
拏石攫木力萬鈞
斯人豪竒邁倫羣
平生慷慨半道淪
高辭壯論胡不存
惜哉獨以技藝聞

沈汧天隱樓

吳會富山水吳興盛人物風流自南朝
德譽世不沒
吾宗州之望譜序遠
且蕃煌煌全盛時
冠蓋充里門
吾廬

兩溪旁足跡遠城市宛自仙者居胡然人間世自我登
羣玉十年未得歸秋風東南望悵息欲下飛軒軒吾
宗子自少慕奇偉仕意一不如去之若泥滓起樓臨孤
墅自以天隱名超焉謝朋友於茲寄生平我初聞以疑
今迺送而喜出處亦何常要之不苟爾俗化日以薄士
路令人哀吾黨多狂簡不知所以裁子歸慎厥修先之
以廉讓風行自田間來者知所尚庶幾吾州士禮義世
弗虧庶幾吾宗門長爲衆表儀毋獨矜汝名毋獨行乎

怪鳥獸非所羣山林固何賴吾雖縻於此亦若與子遊
動哉其無悶勿為至人羞

杭州僧修廣法喜堂

國學佛者營營良足悲不知佛之樂誰使汝學為廣
師吾州秀智解迺天資既以法為喜萬緣脫若遺高堂
客滿坐妙談破羣疑來者豈不辨辨此堂之題

景德寺考試院和李子儀重陽日

勁風疎雨深秋節古寺重局獨坐人菊色未開期有待

莫香欲佩使誰紉登高莫作西城望把鏡須憐白髮新
持酒勸君休惜醉定知歸日不盈旬

景德寺考試院壁和王介甫所題詩二首

石藍開盡紅著地
瓜蔓半枯黃倒垂
坐看一夜芳意歇
風霜即是蚤寒時

夜風吹雨冷通帷
鳴雁初聞一一悲
幸好歸時歸未得
愁來莫讀壁間詩

次韻和王景彝十一月朔早朝

日上扶桑闢九關天威咫尺不違顏簪紳就次初傳警
內外分朝迭進班霜壓陛隅螭闔首風搖殿戶獸鳴環
聖君從諫寬狂直丹檻無容復敢攀

次韻和宋次道省直

少小學文史焉知事簿書時為吏舍直端與玉山疎叢
竹聊相對孤斟彊自據猶欣二三子佳句數開予

次韻和次道十一月朔早朝

紫宸陛戟百重深拜朔官儀列弁簪旭日未全開宿靄

清風先已歛羣陰
適臣自識宵衣志
下士徒懷夙退心
虞氏致平猶有戒
願聞歌載誦餘音

送余良孺大監致仕歸鄉

士有逢辰泰榮名四十朞
更持使者節數建守臣麾
清懿推朝品慈良號吏師
修塗方自致壯志未容衰
雅尚先知止歸心浩若馳
君恩寵年至監尹峻官儀
緩帶金鱗重安輿紫綬垂
達尊傾我里盛觀聳當時
擺落公門事逍遙野老嬉
維應愛玉體五福保期頤

次韻和樂道出省後見寄

君從司會陞延閣更職華光奉講論却顧簿書勞已甚
獨懷僚友意仍存新居近指西城路舊約還尋北海樽
便欲相期五人者軒車蚤晚下宮門

和劉原甫陽春宜白雪

陽春宜白雪良時宜少年試攀瓊樹枝芳意已覺妍梅
花初厭多楊花乍疑早園林光氣生衆物競鮮好一春
都幾日行樂遽勿遲何辭踏泥出猶當秉燭歸少年自

應然老大寧復爾豈不感物華尚能強醇醴

送韓玉汝知洋州

帝制一海內畫州以域民小大雖有殊執任兩各均祖宗
初垂統所重尤守臣授受何其艱便坐躬簡輪承平彌
百年法敝幾不泯其文豈弗具其實蓋已淪遂令師帥
官十九非其人韓侯出名家英聲邁儔倫昔為兩劇縣
遺美今猶新匪直郡邑良固是臺閣珍胡然不畱用出
駕雙朱輪洋州實大府左右控蜀秦厥土從古樂厥俗

於茲淳侯才何足施談笑坐養神君子學無苟不讓誠當
仁既富而後教禮義庶可循坐聽千里謠下徹九重宸
表以視四方寵以屬縉紳因之明黜陟審辨玉與珉尚
使天下治復如前代純鄙言真區區感激為侯陳

送辛有終知鄂州

牛僧孺始為武昌節
度今年侯初為鄂州

江漢交流古要津高牙大旆壓城闔昔尊丞相初開府
今屬郎官試治民迎路壺漿因問俗前車弩矢便行春
由來美化先南國遺樂猶應詠錯薪

蓬萊山送徐仲微赴蓬萊令

渤海三神山蓬萊隱嵯峨仙人桂葉舟浮矣明月波驚塵不可到飛鳥不能過世人但傳聞欲往為奈何胡然古荒王甘心事欺詫於今禱祠跡往往存山阿當時燕齊間方士肩相摩遺俗頗淪胥官不嚴禁訶子去為邑尹施舍各有科茲實繫教化無宜反姸姸平生學詩書仁術嘗切磋毋曰百里小民人豈不多誰當之武城敢復聞絃歌

送句謐通判潁州

朝驅欸段北省客莫駕屏星州治中朱顏綠髮出塵土
長纓高蓋生清風彼都之勝實樂國潁汝交貫淮波通
使子乞得一麾去寧復汲汲須江東

和鄴幾荅李公達遺嘉慶李

朱寶出東土名獨與衆殊友人重家果分贈比明珠堆
盤薄霞色熨齒清露腴恨君賞意淺有酒空盈壺

次韻和冲卿省直

省舍竇偏迫彊分庭與軒君看午熱時何異炊甑然內
景雖屢清外物苦益喧濁河不足滌當尋崑崙源顧身
無羽翼大叫不得前却圖須臾濟雪散和冰丸嗟我江
湖人胡為投此間羨君富高興尚堪吟詠煩

次韻和江鄰幾喜司馬君寶錢君倚章伯鎮入省
之作

我本魯連徒放跡江湖濱彊茲就朝列俯仰羞衆人初
從東觀游尚得文字親晚為大農屬始與俗吏倫簿書

異我學勾校違我貞有如鍛戈劍而乃驅匠輪顛倒失
所措左右迷厥津恍不知適從但欲逃深榛獨幸良友
朋志尚略一均繼今三君來益欣得有鄰誰云典司殊
舍次密若鱗誰云晤語希湄戶日屢巡論文必高妙談
道皆淵渟揮弄塵白玉傾倒巾紫綸謂應饕餮渴寧
復辭昏晨願言勿有倦行即徂秋春宦游固難常出
處各有循公等其謂何我意益欲踐一朝成契闊相望
楚與秦高會不得再空將寄音塵

次韻和景彝秋興

蘭蕙含清露芙蓉隨綠波暑隨朝雨盡涼入暮天多已
覺金行早誰調玉燭和西風但高詠將奈綠醪何

次韻和邵不疑省直

藹藹大農府陰陰道南廬夜直何其頻我性實已疎每
來兀兀坐中懷鬱不舒幸茲新涼至燈火理舊書秋風
吹我衣浩然發歸思念我去江湖人事不復記擾擾彌
十年忽忽都一寐中夜慎勿思無枕不得睡

和君倚景靈行

東城大道何逶迤中直清廟表六扉右臨景靈祕館之
翼翼左帶相國浮圖之巍巍道旁第舍多赭赫車無停
輪馬交策風塵勃鬱千丈高素衣化緇雙眦塞南阡窮
巷我所居上下省戶兩歲餘病軀羸乘寶厭畏每趨徑
路宮城隅宮牆倚空背環極隱嶙樓臺露金碧朝霞夕
照天半明牆下行人徒眩惑我嘗入謁得縱觀威容物
采嚴且完鸞車歲歲躬獻享孝思肸鬻神通歡重門

設衛日常闔靈境那令世人雜但見長松怪石列若屏
突兀陰森兩遮匝我家東南滄海涯乘時偶來觀德輝
歸飛故隱自有期何必於此空歎欬

次韻和君實苦雨三首

浩浩雨不止寥寥風且寒敢言裘褐具尚幸室廬完
彌月天形晦無時輟跡乾田臯何處在誰復顧蕭蘭
不見清秋月悠悠兩過弦重陽初未解委照固無偏
安得長風御都驅宿藹旋還當三五夕圓魄獨當天

積潦高秋後幽居病客心每憐荷折蓋猶愛菊包金獨
坐有餘恨臨觴莫厭深多情省郎直永夜祇清吟

送徐同年謬出京

激立幾年志淹遲一日亨還家晝錦樂拜壽綵衣榮未
辟諸侯府無矜晚宦情重來奏千牘應笑舊題名

西溪集卷一

欽定四庫全書

西溪集卷二

宋 沈遘 撰

代人進南郊禮成詩

并序

伏以皇帝陛下即祚以來躬祀郊廟者凡十一大事盛
禮前世之所難能今陛下有之而孝思不已精意彌發
定雅樂興寶鼎並嚴三后以配上帝天地祖宗之靈以
順以格增前人之光為萬世之法詩書所載二帝三王
之事業今具之於陛下已宋之德其有窮哉臣自獲位

金史卷一百一十五 禮一
卷二
於朝得奉祠事而兩攝綏僕親侍穆穆之光以觀盛禮
臣不勝大幸

宋德承天序郊丘必以時先期發明詔戒日具多儀闕
館嚴真祖清宮謹大祠孝思追祖考禋祀致神祇三聖
同升侑羣靈罔弗祇聲文更舊律鼎鬲列親規禮樂
榮觀洽雲雷慶澤施歡聲充有截盛事極無遺皇祚
千齡永成能萬世宜臣心奚以答歌頌一毫釐

晚雨後過城東

東城雨始歇紫陌無纖埃佳氣四而起游光泛樓臺日
暮市井合斗舞何喧逐我時騎過之顧瞻顏屢開欣幸
其如此平歲無愁猜吾人雖安坐猶能詠康哉

和江鄰幾送文丞相還游普安院

擾擾市朝士一身衆役諛官曹畏職業人事煩往來朝
出被風雨暮還衝塵埃竟歲長如此何時能休哉適聞
丞相行巾車城西隈冠蓋盛出送車馬相喧逐吾有四
君子約言共追陪烏躔轉背午歸來倦支骸道旁有精

舍聊茲釋鞍韉殿閣鬱四合高明絕纖仄曲池含清波魚
鳥中沿洄禁園直南望參差隱樓臺秋風肅衆物野
氣日夕佳幽趣全來會俗紛頓可推高情緬山水劇語雜
譏詼清賞何以娛一枰聊為開豈徒事爭決要且資歡
怡謂言坐上客茲樂那易諧城中苦多事况復日月催
功名未有立壯志先欲摧幸時得閒暇一出紓吾懷此
言固可結此願惟恐乖須臾夕照下欲起姑徘徊攬轡
更留顧餘興無窮涯

和王微之漁陽圖

燕山自是漢家地北望分明掌股間
休作畫圖張屋壁
空令壯士老朱顏

送袁陟通判撫州

上林珊瑚枝太液琉璃波
孔鸞相徘徊鳬鷖不敢過
嘉樹日零落清流成惡腐
凡鳥鬪嬉鳴珍羣搖翮去去兮
將安之江山歛羽儀何時復來還
聊以三歲期

過江鄰幾官舍

君舍城之背蕭然十畝餘四垣通野墅一舸泛官渠夏
木陰成後涼天雨歇初公門日無事觴詠莫容疎

碕岸淺可弄平流清且漪葭蒲亂垂影魚鳥悉浮嬉浩
蕩江湖思差池林壑期誰能共茲語終約不吾欺

願見豈辭遠况從吾友行清談開憤懣高詠聽鏗錡亦
日煩暑却晚風涼氣生歸鞍任傾倒莫惜酬餘觥

奉酬楊祖二閣老中書省齋宿見寄

詞省非吾據維應賴兩公自憐雖壯齒多病祇衰翁飲

興端難彊詩情久已窮還家即高卧客轍任西東

送蘇結赴蜀州推官

嘉陵劔閣萬里道自古當為行役憂於今帝制自無外
仕者何必盡中州我昔成都兩歲留春風秋月多遨遊
須知錦城雖云樂不如早還滄海頭

後殿考進士解嘲

絳闕連碧城白日橫采霓鈞天萬舞徹鸞鳳鳴且飛我
為帝所遊十日不知返我樂殊未央尚恨春晝短東風

吹蟠桃花落滿我衣拂去還復來悠然生我思顧謝衆
仙人我自人間世世累雖可憎天上亦多事

和吳仲庶延菽閣後牡丹花二首

零落欄杆暗蘚侵花苞惟悴怨春深吾君意在延經藝
不學前王宴豫心

承明待詔盡名儒一願當君奏六符獨笑開元供奉客
惟將歌句奉歡娛

送密學施侍郎知杭州

塞外風煙河上塵歸來始覺二毛新承明自厭頻趨直
滄海還思一濯巾幕府旌旗初壓境畫船歌吹便行春
湖山滿目舊游在何日從公醉紫尊

奉祠東太乙宮七首

步虛辭二首

碧城絳闕半夜開翠旗玉節相徘徊景光散墮燈火蔽

步虛一聲天上來

迎神

赤鳥鼓舞揚朝暉白榆零落收夕霏侍臣再拜謝神貺

步虛一聲天上歸

送神

讀道書一首

是日大風

甘泉三日齋讀盡羣王書
天風起寒門便欲凌太虛
顧身無羽翼歎息知何如

齋居有感一首

城中塵埃多白日迷東西
城中市井喧半夜猶鼓鞀
我本江海人偶來東都客
寸心雖自丹兩鬢頗欲白
一為城南宿晚若與世違
不聞車馬音但見煙霞飛
自喜復

自羞胡然久羈旅秋風弄濤時聊可整歸艣

致齋一首

君王無意學神仙獨為蒼生致吉蠲四月麥苗殊未好
一番靈雨即豐年

祀畢大雨一首

由來聖作與天通甘澤祥飈徹俎中更賜太元千歲筭
平明馳賀未央宮

齋居寄楊祖二閣老一首

瀟洒城南尺五天
晝涼高枕夢遊仙
勞君揮翰紫宸裏

汗浥朝衣不得眠

予係直未滿
二君代直

西太乙宮致齋遣興二首

城中暑雨方鬱陶
城外秋風已蕭瑟
下馬解衣高枕眠

惟恐祠官報歸日

我來西郊始三日
超然便若與世違
市朝迺在咫尺爾

况復萬里滄浪歸

西郊一
云甘泉

訪淨因璉上人一首

春風才得馬蹄乾，便向城西學問禪。
不是重陰開白日，自披雲霧覩青天。

次韻和張元常中秋夜不見月

月色初無別人心，自有分長令照清。
夜猶勝掩重雲老去，歡難彊衰來飲。
易醺君家富歌管，獨不使人聞。

送劉定下第

六科收賢才，所得豈非真？奈何如劉子，
反爾棄若淪衆。頗為我嗟我，斯自能信言也。
尚莫知行之得，無訕謝去。

不復顧所重非吾身孝友且為政况茲有民人廣陵昔
富都今已空殘甚行矣欲自彊公卿皆子任

弔普濟大師

鄉里多長者平生愛斯人誰言相識晚俯仰跡已陳寸
心昔固許掛劍義所申空堂對孤詠寂寞猶相親

南漪堂

山遶湖堂寺遶山平生願向此中間青雲白水相浮蕩
野客高僧獨往還少小自嫌軒冕累因循將恐鬢鬚斑

南漪最是逍遙地且挹清波濯愧顏

次韻和少述秋興

浩蕩西風動客裾飄然歸思滿田廬少時豈省為名誤
老去真知與世疎勝事祇隨詩句盡壯懷猶向酒杯舒
南山已有終年約三徑何年得自除

送諸進士赴試禮部

吾州號多士今茲見諸生自非中正舊焉識鄉里評但
喜後來秀紛若春華榮高會存故事工歌追鹿鳴勸酬

金匱要略卷二
皆嘉賓雜奏瑟與笙何以為子贈贈子毋驕盈一獻未
足信要之觀厥成行矣其自厲傾耳聞吉聲

次韻和李審言上元寄王巖夫

此都豪麗歲仍豐此夕都人凱樂中車馬笙簫千里至
樓臺燈火九衢通香輿軋軋凌風駛粉袂翩翩照地紅
病守行春真莫強更堪攀倚少年叢

次韻和王巖夫有美堂會諸年契

西寺題名墨尚新今為賓主此堂人縱談更起揮青麈

極醉何妨倒紫綸
梁苑舊遊皆已往
吳山高會正臨春
欲知勝事常難得
嘉句先應動薦紳

次韻和盧中甫有美堂會諸年契

華屋陳高會
春風衆物新
嘉賓共科籍
勝事動邦人
大白期無算
清談信絕塵
詩豪兩難敵
弱力壓千鈞

次韻和王仲至李審言見寄

相如未用尚文園
暴勝威名世已傳
攬轡一時高莫挹
著書千首浩無邊
顧慙局趣何能駕
望絕驂駟不得前

聖世料材方責實便應歸泛五湖船

次韻和王巖夫見寄

前日移舟就近邨送君西望大梁門九重宮闕天光遠
千里江湖水氣昏壯士遨遊應自適少年離別枉傷魂
北州為政須當厲即上青雲款帝閭

次韻和審言與孫少述會遊審言以病不至

三吳高士壓英躔乘興南來得暫延俗役更思拋吏几
勝遊還約泛湖船平生慕我如飢渴自昔論交孰後先

獨恨良朋不相對一吟嘉句重悵悵

次韻和少述見贈兼簡審言

十年高卧占東南禹穴幽蹤久已探峻節千尋山壁立
虛懷萬頃海波涵愧非仲舉能延士賴有君公為對談
大句聯來兩豪絕應知弱力已難堪

許當郎中自溫陵寄詩敘舊遊之感奉酬

少小溫陵客於今記昔遊故人情最厚嘉句遠相勝
事成陳迹流年換白頭僧坊屢題壁知有舊痕不

江陰楊使君寄示與楊從事唱和詩一軸奉酬

使君嶷嶷下中臺幕府飄飄得上才
仲寶初招庾郎至微之還遇竇生來
江山滿目歸吟筆賓主相忘屬酒杯
自愧鄰城非勝賞聯章大軸為誰開

次韻和孫少述潤州望海樓

北固峩峩鐵甕完
京江浩浩海門連
鵬搏羊角來天外
鰲戴方壺獻几前
西府旌旗猶壯睹
南朝宮殿盡蒼煙
登臨不用成悲感
自得開襟一曠然

次韻和少述雪中見寄

坐看和氣變農愁三白前占歲大收未及勸耕巡屬縣
不妨醜酒望高樓剡中人遠空相憶韓子詩成枉見投
正欲與君論出處扁舟何日肯東浮

和少述春日四首

春日融融二月晴春風藹藹百花明少年嬉逐正應急
何處歌簫走馬聲

風流自古吳王國一一湖山盡勝遊上巳清明最佳節

萬家臨楔錦維舟

初晴池閣暖無塵
花落絲飛不避人
祇愛年年好光景
須知華髮一番新

卧病江東又見春
高齋長日坐生塵
看花飲酒應難強
猶有詩情謝故人

謝王勝之行部浙東還示詩

雒陽貴公子才氣蓋九州
言從承明觀出治東諸侯繡
衣自天下龍節橫江浮
威聲雷霆發惠澤河漢流
簿領

謝俗吏清談揖前修三月初行部飛帆絕潮頭諸山嶙
嶙出委蛇轉前騶衆川淙淙來方洋放扁舟仁智得所
好逍然忘百憂歷訪寧憚遠窮探詎辭幽高懷期康樂
遯跡嘉遠游從容顧賓從此樂復有不長歌裁大句從
者誰敢酬歸來特示我明珠知暗投我本丘樊士久已
失厥謀終無考槃樂但有伐檀羞庶幾不遠復未愧公
儀休

江氏明薦堂

卷二
夫子剛且勇一推遂終身於今斗牛間鬱然氣不申平生慕用意碣刻畱千春更為祠堂詠尚代雞酒陳

次韻和鞠顏叔游山

吏案方無事朋遊出近山相從得所好終日有餘閒棄置形骸外逍遙宇宙間谷風吹淅淅澗水濯潺潺灌木開雲蔭餘花散錦斑輕輿畱石步短櫂下湖灣古寺羣峰合孤洲萬竹環紫鱗驚躍起白羽倦飛還對酒忘塵事臨流見病顏支離真可笑光景信難攀且共隕然醉

誰知是閉關

王仲淹云劉作古之閉關人也

平望道中

積水不知際孤舟緣斷隄新晴寒氣薄短日暮天低為
客情猶昨重來路已迷區區何計了長負舊林栖

將至京口先寄孫少述并呈晏子俞

為郡無聞困米鹽先生有道獨幽潛豫章因甚尊徐孺
益部何能詘蜀嚴已脫簿書身自放肆尋山水意寧厭
京江最欲方洋處願從屏星卷畫幃

奉酬潤州余少卿見寄

兩鎮旌旗對撫邦，老成循政獨難雙。
賜環已許歸西省，擁戟方來絕大江。
後乘願陪幽賞盡，新詩頓使勇心降。
主人意厚春潮小，且卷孤帆偃畫杠。

到淮南

吳山已遠見淮山，木覺風塵上客顏。
家在滄浪重回首，

徜徉且作半年閒。

徜徉一作逡巡又云
北舟聊得半年閒

戲盧中甫錢才翁

晴日春風花氣浮少年嬉逐滿揚州誰憐居士身常病

獨坐空船理白頭

居士身常病一作終歲惜惜病

山光寺一首

寺本隋煬帝故宮

高臺已傾曲池平江都宮殿野草生隋家事遠不須問

淮南非復百年城

今揚州城非唐舊城

謝太傅廟

功業由來出偶然晉師豈必勝苻堅謝公更欲收民望

故築新城坐自全

自揚州與中甫才翁偕行

相遇得所好相從如所期平生慕朋友形跡無牽羈
道路遠千里冬春踰再時要將窮吾樂勿厭行遲遲

和才翁行次山陽

灩灩春波遶郭回飛花無數逐風埃山陽舊客誰相識
疋病區區又到來

覽社湖

青天澹無雲白水平無波拖舟鏡中行奈此清絕何我

行不自亟三日才百里卷卷何所感似泛吳江水湖水
清無際清極不可觸吾纓初自潔將安濯吾足

和中甫新開湖

渺渺清波百里浮昔遊曾是一扁舟十年人事都如夢
猶識湖邊舊客郵

和中甫呂氏園亭

長日陰陰雨與風病夫高卧一舟中少年歡氣誰能遏
縱走名園看落紅

題揚州山光寺

馬蹄輕蹙柳花浮醉入淮南第一州不是青樓羞薄倖

自緣無錦作纏頭

此是中甫和晴日
春風花氣浮詩

高臺已傾池已平隋家宮殿春草生千年前事何足歎

淮南非復舊時城

此詩傳自山光
寺鉉與集中異

西溪集卷二

欽定四庫全書

西溪集卷三

宋 沈遘 撰

十一月二十二日朝辭

朝辭承明殿莫下金馬門伏讀明詔意仰思聖主恩
彼獫獍氏禮數迺弟昆帝初務息民金縢代更屯
嗣皇謹遵業使傳交塞垣下臣非知古有古詎得論
恭承丁寧命敢不夙夜奔

出都

十年中都官未識去宮闕一朝使萬里駟騎催早發徘徊景陽道瞻望未央闈高城接浮雲佳氣正蟠鬱我馬何遲遲中情屢如失王事戒靡監臣心敢他卹曷月還歸哉歸期幸可必

出都日大雪

朔風萬里來一夜卷飛雪漫漫國門路轉轂失故轍人蹤壓不開馬蹄僵欲折問我行安之銜命使邊關君恩念勤遠敦遣禮無缺賜金戒私裝卜日出漢節太官載

供張廐馬先簡閱光華自難勝敢復訴勞茶獨哀徒御
衆馳驅犯寒切每懷實靡及勗爾保嘉烈

陳橋驛

天命豈人力神功非智闕藝祖昔臣周周德久已衰上
將分六師北征在郊圻士卒中夜起神器倉猝移誰言
一朝變迺定萬世基國門一舍地傳舍猶當時故老無
復存遺話嗟何知維畱威神在凜然萬方歸

城北別親友

朝出北門道後車何轟轟顧皆我親友送我沙漠行置
酒古寺堂勸酌紛縱橫飲闌視四坐悄若意弗平試問
坐上客客言安敢承謂我自慷慨固無兒女情幸當無事
時奚忽為北征憐我不受辱往拜單于營憂我衰病餘
跋涉萬里程二者所不堪奈何誰使令我笑謂坐客我
豈徇利名仕既不得已王命方丁寧上羞傳介子下愧蘇
子卿第結匈奴心以保先帝盟惓惓謝親友敢辭嚼雪水

信武殿

匈奴昔南牧先帝躬濯征旌旗從天下龍虎百萬兵元
臣坐帷幄大將當鼓鉦黃蓋臨城樓城下萬歲聲卷起
黃河波飄入單于營單于膽先破旗轍亂縱橫大黃殪
賢王京觀封鯢鯨甘雨洗原野清風藹禁城王師奏凱
歸重譯稽顙盟於今五十載北塞維蠶耕黎民亦何知
但見原廟成下臣方奉使過謁慄若驚威神敢云測尚
冀通精誠

道中見新月寄內

離別始十日已若十歲長行行見新月淚下不成行念
我一身出萬里使臨湟王命不得辭上馬猶慨慷一日
不見君中懷始徊徨我行朔方道風沙雜冰霜朱顏最
先顰綠髮次第蒼腰帶減舊圍衣巾散餘香郵亭苦夜
永燈火寒無光獨歌使誰和孤吟詎成章輾轉不得寐
感極還自傷思君知何如百語不一詳塞雁方南飛玉音
未可望願君愛玉體日看庭樹芳欲知歸期蚤東風弄
浮陽

烽火臺二首

歷歷相望隱舊堆
狐穿兔穴半空推
行人不識問野老
云是昔時烽火臺

烽火銷來五十年
居民初不識戈鋌
耕桑滿野帝何力
千里邊城自晏然

老農問

使者輜車歲不停
金繒兼載價連城
洛陽年少今何怯
未省傳聞敢請纓

荅老農

聖主仁恩務息民收兵方外卷威神
老農自保太平樂
焉用空言羞使臣

將至瀛州從事張祥寄詩和荅

驛騎驅馳萬里身錦貂渾欲變緇塵
平生未識行邊地
今日初欣遇故人洗眼已驚雙鯉至
相看應訝二毛新
羨君獨得從軍樂三歲高陽幕裡賓

道中示三使二首

初持詔節下宮衙四牡臨門取顧家稍遠郊畿還感慨
却瞻原隰自光華使行萬里誰非病義重千鈞始拜嘉
遙指燕山數歸日都城猶未有多花

漢家恩信撫群戎坐息邊民樂歲豐自古所求中國治
於今無復四夷功金繒但取一州賦使介何辭萬里通
顧我衰羸豈堪此共揚威命賴諸公

雄州曹使君夜會戲贈三

擁節纔臨塞北垣正逢歸騎下幽燕昔初並命銀臺下

今獨先還楮案前朔漠風沙辭異域漢家日月望中天
邊城尊酒誰云樂晨坐遙聽更慘然

使還雄州曹使君夜會戲贈三首

風霜滿面使臣歸洗眼看君喜可知更出佳人對紅燭
今宵醉倒欲何辭

法曲新聲出禁坊邊城一聽醉千觴明朝便是南歸客
已覺身飛日月傍

粉面嬌環紅繡裙主翁獨遣勸佳賓他時金谷重相遇

還許尊前問故人

發瓦橋十里而河梁敗還坐客亭復上馬戲詠道
旁垂柳二首

客亭門外纖纖柳解使行人去復還為謝春風搖蕩意
上林桃杏正堪攀

行盡塘陂日已西回頭綠樹却遲遲柔條秀絕向人甚
忍不從容折一枝

過冀州聞介甫送虜使當相遇繼得移文以故事

請避諸路又以詩見寄次韻和荅

風沙敝盡舊狐裘走馬歸來過冀州聞報故人當邂逅
便臨近館為遲留不容傾蓋論時事空寄新詩寫客愁
却望後車塵已合簫聲清斷去如流

至澶州遇吳長文謁告歸奉贈

萬里風霜一病身歸來初喜渡河津舉頭已近長安日
洗眼先逢玉署人平昔每嫌疎館舍今茲暫許接車塵
延英對後應多暇東閣期誰共賞春

還家自戲二首

憶昨邊城初見春
纖纖垂柳正矜新
不知遠客貪歸意
欲把狂絲繫畫輪

遠客歸來眼自明
小桃滿院笑相迎
當時若折邊城柳
定負春風薄倖名

出都

秋風歸夢入東吳
乞得城居占越湖
聖主恩深未知報
豈如張翰為尊鱸

贈李審言

使節歲旌出漢宮我方受瑞守江東解還印綬甘元禮
霽去威嚴幸弱翁金珮並辭丹闕下畫舫相接返波中
過江弩矢應交路斂避須如御史驄

贈王平甫

輕舟喜出大梁城更得高才共載行海內相知君與操
從容尊酒論平生

漕舟

漕舟上太倉一鍾且千金太倉無陳積漕舟來無極畿
兵已十萬三垂戍更多廟堂方濟師將奈東南何

汧河贈審言

黃流千里從天來中貫帝居紫斗魁與君共宣聖主德
餘波漸暨東南垓

平甫許詩未至還贈

平生每愧不能詩今與詩豪書夜隨已許大篇須彊和
少收鋒鏑始相知

淮陰廟

淮陰本自市人子始定三齊便請王明哲保身非所責
如何終欲比張良

和平甫寄介甫羨會稽之行

君家兄弟古人期入直西垣已恨遲莫羨迂踈乞州去
朝廷多事待論思

和平甫越州

六朝開國盡東州此地常居第一流四海今皆歸聖主

萬兵猶得視元侯江山執勝登臨好市邑空殘賦役稠

我去正應千百慮不知能復縱吟不

王詩云縱吟還勝白蘋洲

淮山

淮山萬重紫淮波千里清聊茲快吾目又以潔吾纓夷門多塵埃萬河自泥濁我行何遲遲回望未央閣

將至錢唐先寄施侍郎

去年送施詩有何日從公醉紫萼之句

憶時送公公索詩欲從公醉亦狂辭今叨東鎮恩方厚更過鄰城喜可知已分尊前非敵量獨憐湖上失春期

江南地暖霜無力橘綠萸丹蟹自肥

送十二叔歸巴陵

讀書不遇古所有閒居得地今日稀世故紛紛定難了
況獨身已與衆違洞庭水清君山碧白酒滿市魚滿磯
都門一到十日耳猶恨風塵汗我衣

至樂齋

至人得至美迺能遊至樂茲理難與言紛紛徒爾學五
經陳縱橫夫豈非糟粕吾方任常然來者尚我覺

晝寐

衙退冠佩捐吏休簿書却山城賓客稀永日卧高閣

山中樂

誰言府中居自得山中樂獨醉還獨醒無人事醅酢

鑑湖

鑑湖千頃山四連昔為大澤今平田庸夫況可與慮始
萬年之利一朝毀

愛山

金匱山房詩集 卷三
朝凭泰望紫玉几莫倚卧龍青錦屏平生愛山今日好
尚恨軒冕繫吾形

依韻和韓子華游趙氏園亭

春色先從禁苑來侯家次第競池臺清明已近鞦韆動
上已相尋曲水開繡幕風微花自舞金爐日永麝銷灰
病夫歡意那能彊漫作山公倒載回

彭州使君郎中寄示懷舊之篇輒次韻奉酬

昔下承明得善藩初無佳政可勝殘與民共樂湖山好

遭世承平法制寬當日清談羞俗士歸來白髮困塵鞍
羨君正逐春遨盛豈減東州舊賞歡

將赴會稽過杭州寶月大師法喜堂

悠悠十年別怱怱一夢中故人已白髮相對一病翁日
短語不盡潮生舟復東自笑更自愧此身猶飛蓬

將赴淮南再過蕭山昭慶寺闍黎叔師所居

始作山陰行還尋廣陵路此身未許閒長負滄洲趣往
來古寺居再與高僧遇俗慮雖暫空勞生竟難訴

依韻和杭州施正臣與李審言王道粹宴有美堂

唱酬

昔為鄰政愧難參今讀新詩歎召南美化由來稱樂國
勝遊還足發清談江山臨眺乘秋霽旌節聯歸卷夕嵐
病客區區方北去尚思堂下暫停驂

依韻和李審言見贈敘舊

自與公家三世舊坐看高閑壓亨衢梗柟屢構明堂厦
麟鳳更參聖代符結友固應皆以義論詩何獨取於愚

歸舟早晚乘潮渡猶得西湖一笑無

依韻和施正臣遊聖果寺二首

盤嵒絕巘與天通汗漫煙霞謝世籠
聳起浮圖山突兀自然銜石玉青蔥
古人興廢千年上游客登臨一嘯中

誰為燕然愧班賈孤城羈據亦銘功

排衙石有錢鏐刻詩

長愛高僧住絕岑定知無復俗緣侵
人生擾擾應從昔世事悠悠豈獨今
軒冕儻來真可愧山林歸去莫嫌深
孟軻事業誰能及告子唯先不動心

金剛經
卷三
贈剡縣桃源宮王道士

我昔剡溪遊道人亦相遇重來十歲餘顏色宛如故顧
我病衰早鬢毛已蒼然乃知世上榮詎若山中間道人
家東都問胡不歸北北方多風塵素衣化為黑斯言吾
所信吾志亦江湖瀟洒會稽守平生欣莫如君恩容苟
安願奉三年計幸爾數到城間談北方事

次韻和不疑借書鄰幾過其寢

嗟我江湖人野性實疎簡况從衰病侵事事益以懶豈

不思自彊所資乃有限但愛江夫子平生事高散維
於讀書勤晝夜不去眼每勞從事賢獨使簿書綰揮
署曾不勞兼人信無報有時倦欲休就席初不煖鄰
友更借書丁丁叩門版尤厭吏舍喧牛羊閑棚棧不
如歸吾廬靜對日晚晚詩成還示我足以警幽孱

次韻和沖卿中秋不見月

木葉飄飄客正悲浮雲更起蔽朱曦分無好月臨清夜
且共芳樽樂盛時密戶那憂風蕩燭重簾寧怯露侵

肌金壺漏盡玉山倒天外晴陰誰復知

大行皇帝挽歌辭五首

正統千齡接端朝四紀長無為獨高拱博施極多方昔也稱何力今焉怨彼蒼維應傳聖嗣有以慰民望

二

歷數當興運謳歌屬太平成康能述業文景善持盈海外咸來獻區中不識兵至仁終莫報何以盡羣情

三

欲識承平事君王五十年耕桑連萬里歌吹被三邊德
至消羣慝恩深極漏泉如何一朝變羣慝訴蒼天

四

四海蒼生衆真知不世逢方將請巡幸然後議登封鑄
鼎未云就乘雲安所從尤哀此下國無路望髯龍

五

西望陵臺遠陰陰白日昏孤臣欲從死累世未酬恩身
隔千官列心隨萬國奔維臨滄海上泣血就前痕

陳府君挽歌辭

吳會多長者斯人昔所欽
高材誰復見令聞獨留今
松柏開原勢笳簫送水陰
安知此吉卜有子服朝簪

吳正肅公挽歌辭

天下賢良選當今第一才
文章祕羣玉事業照三台
暫作東山去還期宣室來
蒼生方願治梁木何先摧

又

四海瞻師宰中朝倚典刑
胡然賦金器獨弗與多齡
柱

石虧宮廟鹽梅輟鼎錙風流不可挹無愧史臣名

又


茹鼓周南地公嘗此保釐都人懷舊德行路起新悲昔
我祈難老今天莫愁遺吁嗟如可贖猶願百身為

晏元獻公挽歌辭

英才動先聖盛業啓今王朝廷尊元老官師仰典常才
還宣室對遽歎哲人亡獨有勲名在書為後世光

又

四海尚多事君心屬太平天胡不遺愆邦早奪耆英柱
石傾宮構鹽梅廢鼎烹斯人無復見誰意在蒼生



西溪集卷三

欽定四庫全書

集部

西溪集卷四

詳校官庶吉士臣馬履泰

檢討臣何思鈞覆勘

總校官庶吉士臣何思鈞

校對官中書臣李奎

謄錄監生臣謝大倫

欽定四庫全書

西溪集卷四

宋 沈遘 撰

觀文殿大學士除節度使知邊鎮制

內外之臣文武是憲出入帷幄所以重學問之求征伐
四方所以賴爪牙之任雖自二柄實均一途蓋權有以
適變者各存乎時材可以應衆者維其所用眷言方面
申建將臣簡自朕心告於爾衆具官某材劇志大經明
行修博習前載之方講聞當世之務自始陳力周爰在

廷懋乎秉其一心毅然見其中立登在法從實先近僚
用陪祕殿之嚴益重中朝之選夙夜無怠陟降有常弗
吐剛而茹柔侃焉正色能盡忠而補過維曰靖恭固有
大臣之方允為本朝之望屬茲謀帥尤必得人我方才
難僉以汝薦是用舉斧鉞之利裁麾節之華授之兵符
分以州部凡茲授受之重實維推擇之艱於戲總萬兵
之權當一面之寄董之以紀律撫之以惠恩非勇無以
先人非謀無以慮敵機至而後應名正而後行必使師

徒無傷疆場不警我狄面內而至方外率循朝廷奠枕
以居天下咸若皆汝之責其往欽哉

翰林學士除御史中丞制

御史中執法典綱紀總方畧大臣之任也凡朝廷內外
公卿百執事雖各有分職矣然其有枉直有興壞所以
察舉之使一納於軌則而以成治體者是其任也夫豈
輕授之哉具官某行有典刑學有師法文章必適於用
論議必造乎理周旋內外風采甚著自居金鑾之祕樞

機周密顧問浹洽藹然有大臣之體是宜益試以政序其功效故朕以爾長御史且今大夫缺位御史之任汝得專焉凡汝之職汝既知之矣汝其懋之無俾官有曠事法有廢舉以為汝謫也

誠勵貢士敦尚行實詔

朕上稽三代下監漢唐設為選舉之法以進天下之士數詔執事更定其制維恐不盡又使天下興建學校自京師所以長育人材維恐不至朕之於選舉可謂勤矣

然比歲以來士之進於有司者益不及於前時鄉非無學也而莫從學非無師也而莫事讀書者棄其實為文者取其華羣居燕處則不聞仁義之談雜進並趨則不聞禮讓之節一旦較之於利害之途欲其有古人之風不可得矣然而遂論之以充吾之列位而以治民成化其可望乎嗚呼凡爾守令師帥官吾所以共治天下者也豈不念此今吾將重申之夫自治者能治人不自治者治於人高爵重祿所以待天下之賢也然豈直欲寵

其一身哉將欲以治吾民爾今不能自進其德修其業
乃欲睹吾之高爵重祿亦以難矣凡爾守令師帥之官
其皆告爾之士民以朕之詔使各自進於此毋怠毋忽
毋重有前日之弊凡貢之於朝者必得名稱其實材充
於舉斯可矣苟繆於此國有常憲朕不得私

內殿崇班劉象興可左監門衛將軍致仕

勅某夫壯而陳力老而還政仕者之常也惟爾早以材
武服於朝列今年至而請謝朕嘉爾有知止之思是用

因爾功狀陞爾以環衛之秩俾休於家以安爾私始終之榮祇服焉可

宣州涇縣主簿陳育可秘書校書郎致仕

勅某始以貲粟獻於有司故賜之以官亦既効力乃以疾告尚念其奔走之勞命以京司之秩以為爾里閭之寵朕所以報爾者至矣其恭承之可

安素處士高懌可光祿寺丞致仕

勅某夫舉逸民禮賢者所以歸天下之心厲士大夫之

志古聖王之事也朕今用之惟爾經明行修高尚其事
安於丘園前日大臣更以為言朕不奪爾志以處士之
名今部使者又言爾年彌高而德彌劭宜進之王官為
朝廷之光故命爾丞於光祿即安於家朕豈不貪用賢
哉顧爾老矣不可復勞以官職之事爾其服我休寵益
懋厥修毋近名毋行怪以全爾之節以稱朕之恩可

內殿崇班張崇亮可內殿丞制

勅某考課之法文武並用所以勸能勵眾也以爾積累

勞次既位列朝今歲格薦應復當序進進之一等奉承制旨往懋厥職以答光寵可

職方員外郎石元之可屯田郎中祕書丞韓震可
太常博士

勅某等夫三載考績唐虞之所以叙百官而成大治稱盛德者也朕今用之以爾等並由俊造之第更著事功以序位於朝今歲格薦應復當增秩增之一等南官正郎秩宗博士皆高選也汝欽承之無替朕命可

度支員外郎充集賢校理沈康可司封員外郎餘

如故

勅某夫錄德而定位量能而授任官人之大方也然考績黜陟之典自古用之所以示勸沮出誅賞礪世而磨鈍者也惟爾文辭之美發於儒科材用之裕見於初仕朕用大臣之薦登爾於學官擢爾於書閣升位於朝再居卽位者復三年矣今有司稽閱來上以爾當陟故進汝以王爵之副益左曹之前列也爾其欽承之無易我

丕顯之訓可

供備庫副使桑湜可文思副使

勅某朝廷設武爵之等所以待材力之士也今丞相言
汝節義勇幹有古將帥之烈又退讓廉靖不自伐其勞
以祈進朕維爾父有功於國而歿其身為吾士大夫之
所稱慕今爾克世其家又為吾丞相之所舉朕何愛一
等之爵而不以褒爾哉其陞貳諸使之上列以稱朕之
意所以圖報者在爾焉可

德州錄事叅軍韓嘉言可光祿寺丞

勅某廷尉天下之平而有司之至重也為其屬者豈可
以非其人哉今大理言爾以法律自請而試之有效故
命爾丞於京司以佐廷尉其所以為爾職者既知之矣
其祇服焉可

著作佐郎周尹呂公善可并祕書丞

勅某等咸稱俊選擢佐著作出宰縣道今有司考課按
此當遷擢於內省序於朝列往服休寵毋怠爾修可

供備庫副使王世卞可西京左藏庫副使

勅某文武班爵之法各有名品以待吾士大夫之賢而進退上下自以功罪古今不易之道也惟爾早以勞能序位於朝遂貳諸使今考績應率再遷爾於上列光寵多矣爾其思之可

奏舉人前懷州武德縣令周佐堯修武縣令梁造可並大理寺丞

勅某等吏部選法有歲考之第有功罪之計有薦論之

目其法密矣州縣之吏有能應之最而無殿者皆良吏也
以爾等並由令宰以有課効按籍來上故命爾丞於
廷尉其漸光顯往祇厥服無易無怠可

前著作佐郎魏應臣前大理丞田曾杜子才前將
佐監主簿劉公懿可並舊官服闋

勅某等夫三年之喪聖人之中制也過猶不及矧吾士
大夫立於朝廷以承教化一風俗者可不奉此以爾等
頃罹不幸顛沛去職今禮服終矣其復爾位移孝為忠

朕所望於爾也可

太常博士朱詰徐說可並屯田員外郎

勅某等古之卽選重矣非茂材雅行簡於衆者未嘗輕授也今雖尚書之職分異不皆署曹然其官儀地望自高矣以爾等並用文學射策以歷位於朝今有司考績當陟並遷爾於司田副郎夫德懋懋官功懋懋賞無易爾心無替朕命尚有顯爵重祿以待汝焉可

內臣加恩

勅某等朕制禮作樂大禘宗廟既事告休推錫在位咸以周浹爾等奉事闕闕豈無勞勩均之賞渥以盡無不酬報之誼可

撫州奏臨川縣臨汝鄉何或一百七歲可本州助

教

勅某洪範五福首壽古者有養老之禮而天子巡狩先見百年益老者人之所尊而為國家者可以教者也朕比詔天下博采以聞今爾本郡以爾來上朕甚嘉之故

命爾以下士之秩助教於州里爾其保期頤之福承朝廷之意安於丘閭榮且逸也可

隴州汧陽縣主簿袁衍可太子洗馬致仕

勅某奔走州縣亦既有年今其老矣願還官政嘉爾止足錄爾勤勩升秩朝序歸安里閭足為寵榮其往祇服可

內侍省內常侍韓永文可內殿崇班

勅某中侍之臣出入禁闥受宣詔命至親密矣非小心

端信能寡其過者吾弗用也以爾幼而秀毓出於羣輩周旋服事其勤不怠朕甚嘉之故稽爾歲績增爾之秩班於中朝以為爾寵戒之懋之無替厥素朕不忘爾也可

奏舉人前綿州神泉縣令解補之前相州永和縣令呂撝可並大理寺丞

勅某等夫有百里之地得專其政而行其志古諸侯之選也有能撫其民人使無散流平其賦訟使無偏枉以

成三載之績而又有保任之舉者朕其可不賞以勸之
哉以爾等並為劇縣以有功狀歸於有司有司稽攷咸
應其法書而來上肆朕擢爾丞於廷尉列於王官爾其
祇畏所事無怠厥舊庶乎益進於朝永有光顯也可

故虞部員外郎致仕范堯佐男昇卿可試將作監
主簿

勅某夫朝廷之士生則有爵祿之寵歿則褒立其嗣吾
於士大夫恩可謂至矣爾父堯佐服事陳力致位於郎

老而請去始終可紀今其亡也朕尚念之故推叙及爾錫以一命試於工正之屬爾其飭恭慎思自進於名以無忝爾考之美可

陳州錄事叅軍尚起可太子中舍致仕

勅某州縣之職勞矣爾周旋其間至於十年而不能自奮以出今乃以老告朕甚憫之故命有司攷狀來上秩爾以春官之屬通籍於朝所以為爾恩者至矣爾其保之以終福祿可

入內東頭供奉官綦元亨可內殿崇班

勅某內宰小臣所以給房閨之役趨走之任也故非其
久無過其勞可書者未嘗輒遷焉以汝叅典禁藏四歲
於此而出納無違鈎較甚明且有贏羨以裨少府之用
籍奏前上朕甚嘉之不可遺也其增秩一等班於殿朝
以為爾報其往遵職無棄前効可

皇姪孫右千牛衛將軍世顯可贈右屯衛大將軍
勅某夫立愛自親始所以教天下之孝也朕於宗室貴

之富之固有不至其不幸而淪謝者亦必褒顯尊寵之
所以篤始終無窮之恩也惟爾孝友恭肅有聞於家謂
宜壽考以表於衆奄忽而化徹於予聞何傷如之其贈
以大將軍之章綬使九原而可作也尚知我親親之德
無存歿之異而歆服焉可

供備庫副使曹任可西京左藏庫副使

勅某延安國之西園也吾宿師以固之謀帥以護之又
擇材勇之士屬之麾下所以為其爪牙之任以爾早縻

武爵遂貳內使實應是選以監州兵今維夏戎服命王師不出無以為爾功而累日計歲拊循講輯之勞不可不報也其陞諸使之前列以為爾恩爾其祇勗圖有後効可

大理評事張太寧將作監丞王儀可並大理寺丞太常寺大祝王景純可大理評事

勅某等朝廷制爵祿以待天下之士大夫其路廣矣其流衆矣然既試以職而質其成序以陟之則其法一焉

太寧也由辭科儀與景純也由世賞各以廉能而應課
最有司舉三歲之典來上肆朕並以為廷尉之屬或承
其長或平其法皆曰良選漸於榮階尚有不次之賞以
俟爾卓然之効爾其勉焉可

開封府推官祠部員外郎充秘閣校理張芻可度
支員外郎餘如故

勅某東觀吾圖書之府而禮樂之原也其流至高京兆
吾大衆之地而四方之則也其治至難其用人非有文

學政事之實未嘗輕以授也以爾資賦甚美矯然有立並應是選優有餘裕實充多士之望而有司舉考績增秩之典以言故遷爾卽位一等夫特達之士豈計其歲月之勞而序進之哉顧三載之法朝廷之舊不可廢也固有尊顯光大之爵以待爾爾以懋焉可

江州錄事參軍監鄂州買納茶場和偓可大理評事

勅某大司農制天下之貨財以給縣官之用凡膺其事

者皆有賞罰今乃言爾前領武昌權茶而能遵職謹法
有益於司農請以賞之肆今選爾於廷尉平以答爾勞
以勸能吏可

東頭供奉官李永慶崔昭明可並內殿崇班

勅某等三班武吏其取雜矣其進艱矣有能以廉自持
以勤自効奮而出乎其間者可不尚之今爾等克應其
法籍以為奏故命之班於殿中序於朝列其為爾寵不
亦多乎往哉祇服可

台州寧海縣令魏昂可試大理評事充山南東道

節推知南劍州劍浦縣

勅某前日天下令長多非其人始詔刺舉牧守之臣
詹為之故遠近之縣十七八治朕甚嘉之汝其選也
汝既三歲被代而知者尚鮮何哉雖然不可不少褒也
其升職幕府復為百里益有以薦於朝者當命汝遷焉
可奏舉人前推武信軍節推安宗謹可大理寺丞

勅某天下之治久矣士大夫雜遝歸吾有司者不可勝

數而吏部尤衆蓋吾公卿之才間而自出雖然賢不肖不分溷焉一途孰從而辨之哉故設為考績之法甚備又使刺舉之臣薦其所知覆之中銓以質其成然後命之以遷所以用人者如此其慎庶幾人人而得其真乎以爾端恪修潔有聞於衆實應吾法故陟爾為廷尉丞列於王官以漸光顯爾其服我之丕訓畏於厥職以思進也可

陝州文學趙淑可華州別駕

勅其朝廷以美名豐祿寵養士大夫者使之為政治民也爾不念此乃自投於法是宜棄而弗用矣尚矜其過或自悔復稍進於籍使處近州益觀厥為以出後命可禮賓使李中祐可六宅使

勅其朕疆理天下申畫州部並建牧帥以制四方而蜀在西南一都會也故常用左右之臣以撫其地又命才武之將以佐其軍其寄付之重籌選之艱固以異矣以爾功名之後能世其美厯守邊障率有成效故躡諸使

卷四
之等以選爾秩領兩道之兵以輔爾帥其所以為汝職者吾既授之爾帥矣爾其善助之有賞有罰待爾而出矣可

大理寺丞馬希元魏絳耿仲履時選陳安世可並

太子中舍

勅某等天下治安郡縣衆職鉅細煩簡皆有常法吾士大夫當其任者能遵之而勿失順之而勿擾使官無廢事民無病政吏無奸聞以至於朝者皆良吏也以爾等

並有闕闕在於有司自秩廷尉於茲三歲豈可不遷以
勸之哉其升東宮之屬通籍於朝亦足以顯矣其益自
懋以進不已可

內東頭供奉官廖浩然可內殿崇班

勅某禁闥小臣衆矣非以德舉而材選也特以給左右
之役遵內外之事而已故未嘗輕命以遷所以異乎吾
外廷士大夫之典也今爾考不幸乃有遺封以爾為請
朕念爾考事我之久位于通顯汝亦謹信無咎故進汝

之秩班於殿朝以為汝寵朕於汝父子可謂至矣其思所以報我者焉可

殿前都虞候天平軍節度觀察留後李璋奏百姓醫生王逢辰可試國子四門助教

勅某爾以醫為技事我戚里有言於朝稱厥能効願得齒於士籍故錫爾一命以為之恩其慎厥操術無辱於官也可

供備庫副使李詵可西京左藏庫副使

勅某爾父端懿太主之子國之近戚而降年不永奄忽云亡朕甚哀之既以贈襚極其禮數又得其遺封乃以爾為言朕既益傷其天性之恩豈復於爾有所愛哉其陞序諸使之前列以榮爾立朝之路以慰爾考泉壤之思可

大理寺丞充本寺詳斷官王彭可太子右贊善大夫

勅某夫法者國之防獄者民之命也蓋一失其平則天

下無所措其手足矣故自唐虞三代莫不重之書不云
乎欽哉欽哉惟刑之恤哉夫以舜為君而臯陶為士尚
且丁寧飭戒如是之勤况後之不及乎恭惟先帝審刑
之意協於唐虞故朕於法官之任益不敢輕以爾明察
忠恕通律家之本故以爾為廷尉之屬今有司考三歲
之績而實稱朕選可不遷以為勸哉其陞東宮之寮序
于朝列尚觀其後益有褒顯爾其懋之可

將作監主簿呂昌祐可太常寺太祝

勅某夫考績之法唐虞之所以馭百官而成大治稱盛德者也朕今用之以爾故相之後為吏有方應於陟典故升爾於奉常之屬夫世祿之子雖其進也異乎才德之舉然既授之政而能奉職自効無悖於理吾亦何愛而不以褒進之乎爾其懋之可

荆湖南路轉運使祠部員外郎直集賢院陸誥可

刑部員外郎依前職

勅某荊州之域其方數千里國家畫為兩部分命使者

其南部郡縣數十內撫江漢外制羣蠻吏民甚衆兵食甚廣克稱厥任常難其人自吾得詵無復一方之憂吾誠嘉之惟詵行義之美材知之卻更職儒館出入中外文雅政事沛焉有餘自將命於南風迹尤著朕方任之以重致之於遠而有司舉三載之典請以明陟朕豈以歲月之計而待特達之士哉顧考績之法堯舜所用朝廷之舊不可輒廢故遷爾即位一等貳於司憲益尚書之高選也其往祗服吾且圖爾之功矣爾其勗哉可

大理寺丞寇誦可加騎都尉

勅某朕前以大裕之禮薦於宗廟既事告休推廣慶賜罔有遠邇莫不周浹况吾士大夫服勞在位而可遺之乎其賜爾勲一等以稱朕意往哉祗服可

皇親太子率府率宗粹以下可並右千牛衛將軍勅某等棠棣之詩曰棠棣之華鄂不韡韡凡今之人莫如兄弟又曰兄弟既具和樂且孺言篤兄弟之恩以及九族也蓋周公作之召公歌之而周之懿德也朕甚慕

卷四
馬汝等席慶承祉蓄德揚采陟降朝邸允其藩睦實稱
朕之意故思有以褒寵之其各遷所秩列之禁衛嗚呼
汝其恭于師保服于詩禮慎修思永以享長久之祿以
協我親親之恩可

皇親左監門衛將軍克揚以下可並右領軍衛大
將軍

勅某等昔開睢之化行而麟應之故公族振振信厚與
禮相應無犯於非何其盛也朕上承祖宗之慶下撫宗

子之衆刑于衽席以御天下庶乎古先明王之德而汝等祇序上下克有禮節穆然令聞揚於外廷使我尚無愧於前人甚可嘉也肆詔宗正條上因汝故秩環衛遷於大將嗚呼汝其夙夜祇飭無蹈匪彛以戮我邦家之治可

勅賜進士及第朱長文可試祕校守許州司戶參軍

勅某前日朕詔有司以天下所貢士來試於廷爾以文

辭之美得署乙科屬於吏部吏部舉限年之法未即用也今既冠矣請命以官惟爾早成既登策選復歸於家益修不迫而且大夫之世也其人事其吏方宜亦習而明矣往棣州服母廢母易以啟揚我休命可

殿中丞符拱之可太常博士

勅某唐虞三載考績三考黜陟幽明朕誠遲之周禮三歲大計群吏而誅賞之郁郁乎文吾從周審官之法是也今其以爾閥閱來上請以遷朕惟爾武功之世而能

卓然自奮于文學以第雋造之選既可尚矣今出佐西
帥之府而其治行又應吾有司之比顧可不以陟哉其
升之春官博士以屬其志往哉祇服可

前信州錄事參軍朱逢吉可太子中舍致仕

勅某凡士大夫之壯者吾勉以進之老者吾優以退之
顧豈私于一士哉所以勸乎群臣也以爾周旋州縣至
於十年既不能卓然自奮以期於用今乃自列乞身以
去朕豈復有愛於爾而不以勵於衆哉其升秩春宮之

屬通籍於朝以稱朕意其往祇服可

屯田員外郎舒昭亮可都官員外郎

勅某周官太宰之八法曰官計以弊邦治謂三歲而斷
群吏以廢置之也朕方綜覈名實眎以為法惟爾由俊
造之第周旋外廷遂位于郎以長一州今有司上爾闕
閎克應其法故進爾秩一等副于中都夫饒劇郡也甚
難其才有能稱厥職朕且待以不次之位尚復序而進
之哉爾其懋焉可

屯田員外郎李東等可並服闋舊官

勅某等傳曰喪三年以為極亡則弗之忘矣然先王之制不可過也爾等昔者不幸至於大故以去其位今既除宜復爾舊立身揚名以顯厥先吾所望於爾也可

太常少卿席平可光祿卿

勅九卿之尊法河海而通寒暑光祿之貴典宿衛而總
即吏自漢以來其選甚重本朝之制非老成久次亦未
嘗輕用也具官某文學之選初無能名嘗佐御史歷守

大郡遂貳九列朕方以唐虞考績之典甄序百工故陟
爾為正卿夫其官儀之寵恩數之豐凡厥在廷能致於
此者幾希矣爾其惕畏強勉以究所職以荷我不顯之
命可

祕書省著作佐郎王琳可祕書丞

勅某學者之言必曰治民今夫令長之任莫親於民矣
然既居之而能稱之者何少也豈徒能言之乎吾無取
焉爾今汝其學者也其所居又大縣也爾之遷三歲矣

今復升爾位於朝我之所以為爾寵者至矣爾亦嘗能
行其所聞乎其祇聽朕命夫欲下之信者莫若躬欲衆
之格者莫若德勞徠之惻怛之寬則惠於吏猛則暴於
民如是而已汝其奉行無自斃壞邦有常憲可

內殿崇班馮天祐可左監門衛將軍

勅某夫陳力就列不能者止豈曰能讓哉亦循其分而
已然視諸貪而不知敗者斯可賢矣茲朕所以加優乎
去位之臣也今汝之年雖未至而以疾自列亦可謂能

循其分者歟其升秩環衛退安於家以勵吾士大夫之意可

左藏庫副使李賡可庄宅使

勅某太官之建總膳夫庖人內外饗享人之五職在殿中六尚其為任獨重而其事獨叢矣非幹敏之吏不能辦也以爾陳力從事三歲於茲攷會其狀咸應舊典故遷爾以諸使之正以答爾勞其往祇服可

內殿承制周世昌可供備庫副使

勅某廣內祕府吾所以聚天下之書而延天下之才者也夫其講論六藝是正文字則諸臣之任矣若乃筦庫之責出納之禁則命之以中侍之臣所以重其事也惟爾端信廉飭更使內外咸有善稱自職東觀益勤不怠故吾舉考績之制命爾貳乎諸使之列爾其思我所以褒爾者毋廢厥修期永終譽可

內殿承制唐詵等並可供備庫副使內殿崇班張宗訥等並可內殿承制

勅某等天下又安方外無警而兵之不試者久矣才武之臣寧復有非常之功而取不次之賞乎然方鎮有屯戍邊圉有斥堠拊循講輯譏察誰何之勞亦不可遺也爾等並以勇選而領軍事按籍以遷或貳諸使或承制旨皆曰顯爵其往祇服益圖所報可

入內內侍省內東頭供奉官曹宗吉可內殿崇班勅某北戎請和一方無警然邊常宿兵以備豫不虞而塞外之事軍中之情吾所欲知故以軒闥之臣乘遽往

來以察之而爾實當其選於茲三歲其勞可書增秩一等序於朝列報爾之寵其祇服焉可

西京左藏庫副使白均可供備庫使

勅某五嶺之南桂林之管其地千里外接夷粵常宿兵置帥以衛連城而前日烏戰之寇數入以侵擾我郡邑之民故臨遣使臣往撫定之既乃薦爾之才請以督一道之兵為之貳肆遷爾於諸使之正就蒞其政凡爾之職爾既已參而知之矣其益悉乃心奮乃力毋敗乃事

以奸我邦憲可

前守汀州上杭縣尉兼主簿張奎可試祕校充春

州軍事推官通判春州兼知本州

勅某春州在南海之徼崎嶇夷貊之間華人不居益自
昔記之矣國家斥有四疆聲教咸暨置吏治民一視中
州其德澤之所浸禮義之所揉固已變於古矣然吏之
往者猶加優其恩所以慰其萬里之心也今吏部調爾
為州從事且總守長之任故朕命爾服章稟賜率踰常

等以為爾恩雖曰遠且勞矣其亦寵而豐乎往哉祇服可

左侍禁田文廣可行太子左清道率府副率

勅某夫知進而不知退辱莫甚焉知得而不知失殆莫甚焉今爾之年幾于耄而既犯乎禮與律矣其免於辱且殆者幾何吾所以尚加優而謝汝者以爾尚能自請爾其升秩東宮之屬榮其歸路嗚呼吾之於小臣始終之恩其至矣哉可

濮州鄆城縣尉鄭務先可冀州棗強縣令

勅某夫良民之為生艱矣其黠惡者乃羣行而奪擾之
豈不哀哉故雖一邑之小必有尉者以此也然猶恐其
或弗能稱職故設為賞法以勸之今爾之所補除者實
應於格有司條上遷爾邑令益有民事其往試之無忝
朕命可

西溪集卷四